

BANTANG AWIG-AWIG DESA ADAT DADIA

MURDHA CITTA		1.
PRATHAMAS SARGAH	ARAN LAN WEWIDANGAN DESA	2
DWITIYAS SARGAH	PATITIS LAN PAMIKUKUH	2.
TRTIYAS SARGAH	SUKERTAN TATA PAKRAMAN	
	Palet 1 Indik Krama	3.
	Palet 2 Indik Prajuru lan Dulun Desa	6
	Palet 3 Indik Kukul	8.
	Palet 4 Indik Paruman	9.
	Palet 5 Indik Druwen Desa	10.
	Palet 6 Sukerta Pamitegep	
	Kaping 1 Karang, Tegal, lan Carik.	11.
	Kaping 2 Pepayonan	12.
	Kaping 3 Wewangunan	13.
	Kaping 4 Wewalungan	13.
	Kaping 5 Indik Bhaya	14.
	Kaping 6 Panyanggran Banjar	14.
CATURTHAS SARGA	SUKERTAN TATA AGAMA	
	Palet 1 Indik Dewa Yajnya	15.
	Palet 2 Indik Resi Yajnya	19.
	Palet 3 Indik Pitra Yajnya	19.
	Palet 4 Indik Manusa Yajnya	23.
	Palet 5 Indik Bhuta Yajnya	23.
PANCAMAS SARGAH	SUKERTA TATA PAWONGAN	
	Palet 1 Indik Pawiwahan	24.
	Palet 2 Indik Nyapihan	25.
	Palet 3 Indik Sentana	25.
	Palet 4 Indik Warisan	26.
SAT SARGAH	WICARA LAN PAMIDANDA	
	Palet 1 Indik Wicara	26.
	Palet 2 Indik Pamidanda	27.
SAPTAMAS SARGAH	NGUWAH-UWUHIN AWIG-AWIG	28.
ASTAMAS SARGAH	S A M A P T A	29.

MURDHA CITTA
OM AWIGHNAM ASTU NAMA SIDDHAM !

Sembah bakti miwah pengastawan titiang majeng ring paduka Bhatara-Bhatari sesuwunan titiang sami, riantukan wantah malarapan pangyangning kalih paswecan Ida Sang Hyang Widhi Wasa asung kertawaranugraha nyresti jagat jangkep rawuhing sadagingnya sami, mawinan wenten kahuripan sekala niskala ring Bhuwana Agung miwah ring Bhuwana Alit. Manut dresta, Desane kemanggehang dados pasayuban Krama Desa rawuhing kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Satoninmg pawakan Bhuwana Agung, Desane taler kemanggehang pinaka pawakan bhawa mahurip, sane kacirenin antuk wentene pakilit Tri Hita Karana sane nenten dados pasahang, luwire :

- ha. Parhyangan, sahanan parhyangan panyiwian Desa, genah ngarcana bhawan Ida Sang Hyang Parama Wisesa, pinaka jiwaan Desane ;
- na. Pawongan , gebogan krama saha warga Desa maka sami pinaka bayu pramanan Desane, mawinan Desane prasida maolahan prawretti ;
- ca. Palemahan, sahananing tanah kekuwuban wewidangan Desa, pinaka sthulan Desane.

Adung patemoning Bhuwana Agung ring Bhuwana Alit, maka larapan ngupadi santa jagadhita, punika sinanggeh murdhaning prayojana prangriptaning awig-awig iki, rikala paseban mami Krama Desa Adat Dadia, pinaka sepat siku-siku pamatut pamutus, wastu kasidan prayojanan mami kabeh, prasama angidep muwah amagehaken lingling awig-awig kadi ring sor iki.

PRTHAMAS SARGAH
ARAN LAN WEWIDANGAN DESA
PAWOS 1

- (1) Desa Adat puniki mawasta Desa Adat DADIA
- (2) Jebar kekuwub wewidangannya mewates nyatur desa :
 - ha. Sisa Wetan : Tukad Yeh Munti
 - na. Sisi Kidul : Desa Adat Sunantaya
 - ca. Sisi Kulon : Tukad Yeh Empas
 - ra. Sisi Lor : Desa adat Pagi
- (3) Jebar kekuwub wewidangan sane kawengku antuk wates-wates inucap ring ajeng, linggahnya wenten : Ha.
- (4) Sane kamanggehang ngranjing dados kekuwub wewidangan Desa Adat Puniki, manut dresta, luwire :
 - ha. Pupulan karang paumahan sane sinangeh Palemahan Desa Pakraman;
 - na. Setra, carik miwah tegal sane wenten ring kekuwub wewidangan Desa Adat Puniki sajabaning Palemahan Desa Pakraman, manggeh ngranjing dados Telajakan Desa Adat DADIA.
- (5) Awig-awig, Pararem miwah sahanan Pasuaran Desa, manggeh kajejarang ring jebar kekuwub wewidangan Desa Adat Puniki sami.

DWITYAS SARGAH
PATITIS LAN PAMIKUKUH

PAWOS 2

Desa Adat DADIA ngamanggehang pamikukuh, minakadi :

- 1) Pancasila ;
- 2) Undang-undang Dasar 1945, pamekas pasal 18 ;
- 3) Tri Hita Karana, manut sadacara Agama Hindu.

PAWOS 3

Luwir Patitis Desa Adat DADIA, inggih punika :

- 1) Mikukuhin miwah ngranjegang Sang Hyang Agama ;
- 2) Nginggilang tata prawrettine maagama ;
- 3) Ngrajegang kasukertan Desa Adat saha Pawongannya sekala lan niskala.

TRTIYAS SARGAH

SUKERTAN TATA PAKRAMAN

PALET 1

INDIK KRAMA

PAWOS 4

- 1) Sahananing sang jenek mapaumahan ring wewengkon wewidangan Desa Adat DADIA, sinanggeh warga Desa Adat DADIA.
- 2) Warga Desa inucap ring ajeng, linggihnyane wenten 2 (kalih) soroh, luwire :
 - ha. Warga Desa sane maagama Hindu tur sareng nyungkemin kahyangan Desa Adat DADIA, sinanggeh Krama Desa Adat DADIA.
 - na. Sajaba punika, sinanggeh Tamiu, sane kasulurang manut pararem.

PAWOS 5

Dasar Pakraman :

- (1) Sahanan warga Desa Adat DADIA sane maagama Hindu sane wahu marabian, patut ngawit dados Krama Desa.
- (2) Satunggil Karma, manut karendahan kulawargannya , patut keni sinalih tunggil ayah-ayah :
 - ha. ayahan ngarep.
 - na. ayahan balu
- (3) Sesengker ngawit tedun ngayah :
 - ha. Marep ring krama Desa sane mawit saking pawiwahan : ngawit saking puput kasaksenan antuk sang tri upasaksi sajeroning upacara pakala-pakalan ;
 - na. Marep ring Krama Desa sane mawit saking ngarangin, kasulurang manut pararem.

- (4) Krama Desa sane wenang nyada yan sampun kapastika, luwire :
 - ha. sungkan tahunan ;
 - na. yan sampun maderbe pangentos utawi panyeledii ;
- (5) Sang saking sewosan desa yan sareng tedun makrama desa ring Desa Adat DADIA, patut keni batu-batu utawi pamogpog, sane agengnya kasulurung manut pararem.
- (6) Yening wenten krama saking sewosan desa sareng ngranjing makrama desa ring Desa Adat DADIA, patut kadulurin antuk surat katerangan sane jangkep.

PAWOS 6

Wusan dados Krama Desa, luwire :

- (1) Sangkaning :
 - ha. Seda
 - na. Pinunas ngraga, manawi magingsir linggih saking wewengkon Desa Adat DADIA.
 - ca. Kanorayang, malantaran piwal ring awig-awig miwah Pararem Krama Desa, utawi tan satinut ring pituduh Prajuru, sajeroning indik nyupat sikian, minakadi nenten prasida ngeschin prawretti ;

PAWOS 7

Sahanan Krama Desa, patut keni tetegenan utawi ayah-ayah, luwire :

- (1) Ayahan Ngarep, mapiteges paturunan miwah ayahan mamungkul saking Krama Ngarep.
- (2) Ayahan Balu, Luwire :
 - ha. Balu Remban, sane pianaknyane kantung alit-alit, punika keni ayahan balu remban, sane kasulurang manut pararem ;
 - na. Balu Ngelintik, keni ayah-ayah balu manut balunnyane, yan lanang keni ayahan lanang, yan istri keni ayahan istri.
- (3) Ritatkala ngardi wewangunan kabuatan Desa Adat Kramane sajaba keni ayahan manut pawos 7, taler patut keni paturunan sakadi ring sor :
 - ha. Paturunan samawibhaga manut pararem ;
 - na. Dana Punia, manut kalascaryan sang medana punia.

(4) Krama Desa, kadadosang :

ha. Mapuankid utawi tan tedun ngayah utawi parum :

1) Rikala mapawangunan, ngraabin, nangun yajnya, nadur, kaluwasan masenger dewasa;

2) Keni dedawuhan saking Guru Wisesa ;

3) Kapialang, luwire : matepetin, kalayusekaran, sungkan lan sakancan punika

na. Dados ngwakilang ring jadina tiosan, sane sampun menek daa/truna.

ca. Dados mogpog **Manut Pararem Desa Adat DADIA.**

ra. Dados nyeledii utawi nyuksukin Krama Ngarep yan sampun mayusa 17 warsa.

PAWOS 8

Kapatut Krama Tamiu :

(1) Krama Tamiu, patut MESADOK ring Desa Adat, manut pararem.

(2) Krama Tamiu, patut polih pasayuban marupa pitulung rikenjekan katiban pancabhaya.

PAWOS 9

Paturunan miwah Leluputan :

(1) Paturunan utawi peson-peson sajeroning ngulati kasukerta Desa Adat, kapitegenang ring Krama Desa.

(2) Desa, maweh leluputan ayah-ayah miwah peson-peson ring sang inggiling linggih wimah sang kawelasarsan.

(3) Sor singgih leluputan wimah bacakan sang polih leluputan, kaunggahang jeroning Pararem.

(4) Sajawaning Prajuru Desa, sane taler pastika polih leluputan, luwire :

ha. para sadhaka, minakadi Pamangku Kahyangan/Panyiwian Desa, lan panyada ;

na. Para serati lan sutri ;

ca. Sang sungkan tahunan ;

ra. Wong cedangga banget ;

ka. Wong ubuh meme bapa, jantos mayusa 16 warsa.

PALET 2
INDIK PRAJURU LAN DULUN DESA

PAWOS 10

- (1) Desa adat DADIA kaenter antuk Prajuru Desa Adat, kamanggala antuk Bendesa Adat.
- (2) Prajuru Desa Adat, patut :
 - ha. Mawit saking krama Ngarep.
 - na. Kaadegang Prajuru malantaran antuk pamilihan jeroning paruman krama desa, nyabran lima warsa, sajawanig wenten pari indikan tios , tur sang sampun puputing panumayo, kengin kapilih malih :
 - ca. maduluran atur piuning ring Pura Desa.

PAWOS 11

- (1) Bendesa Adat, karombo antuk :
 - ha. Panyade, pinaka wakil Bendesa Adat.
 - ca. Panyarikan, pinaka Juru Surat.
 - ra. Kasinoman, pinaka Juru Gumencang.
- (2) Sajeroning ngenterang kasukertan kaniskala, Bendesa Adat, patut misinggihang Pamangku Kahyangan Desa.
- (3) Prajuru Desa taler ngadegang Dulun Desa utawi Panglisir, sane sinanggeh Kerta Desa, mawit saking Prajuru sane sampun puputing panumaya, sang wikan ring adat miwah agama, kepala Desa miwah sane lianan, sane kasulurang manut Pararem.
- (4) Swadarmaning Dulun Desa :
 - ha. Nuntun lan ngewehin darma teti bangan marep ring wicaran Desa Adat Dadia.
 - Na. Tata titine ngelaksanayang swadarmaning darma tetimbang patut saktinut ring daging perarem utawi awig-awig Desa Adat Dadia tur nginggilan sangyang agama.

PAWOS 12

- (1) Swadharmaning Bendesa Adat DADIA Lan Prajuru Desa Adat DADIA :
 - ha. Ngenterang paruman-paruman Desa.
 - na. Ngenterang panglaksanaan sadaging awig-awig miwah pamutus-pamutus Krama Desa, sane sinaggeh Pararem.
 - ca. Ngraksa miwah nudonang tata-titine migunayang sarajabrana druwen Desa.

- ra. Nuntun saha ngenterang Krama Desa rawuhing warga Desa sami, ngupadi kasukertan sekala lan niskala.
 - ka. Nuntun saha saksi upacara sangskraning kahuripan sane mabuat, minakadi sane ngilitang sulur pakulawargan.
 - da. Nuntun saha ngenterang Warga Desa Nginggilan Sang Hyang Agama, kasucian Kahyangan, kasucian Pelemahan, kasucian pawongan, miwah tata-titine migunanyang Setra.
 - ta. Mawosin miwah niwakang pamutus marep ring wicaran warga desa.
 - sa. Ngwakilin Desa, matemuang bebawos ring sapa sira ugi.
 - wa. Lan sane sewosan sane wenten pakilitipun ring desa.
- (2) Tata-titine nglaksanayang swadarma inucap ring ajeng, tan maren patut satinut ring daging awig-awig, pararem, dresta miwah pamutus paruman Krama Desa.
 - (3) Panglaksanane ring ajeng patut kasiarang ring Paruman Desa kapungkuripan.
 - (4) Sumakuta utawi sumanggup natak pamutus paruman Krama Desa, ngeninin swadharman sowang-sowang Prajuru.

PAWOS 13

Patias utawi olih-olihan Prajuru Adat Lan Bendesa Adat Luwire :

- ha. Luput rerramon utawi peson-peson ACI ;
- na. Luput paturunan ACI
- ca. Polih tanding tengah ;
- ra. Polih pah-pahan upon-upon pelaba carik/tegal druwen Desa ;
- ka. Patias sewosan (solasan) manut pararem.

PAWOS 14

- (1) Prajuru lan Dulun Desa, kapilih nyabran 5 warsa, ngawit saking padiwasane kaadegang Prajuru lan Dulun Desa.
- (2) Prajuru lan Dulun Desa sane swardharmannya sampun puputing sengker, kengin kapilih malih.
- (3) Pari nidikane ngadegang Prajuru lan Dulun Desa sakaluwire, kapastikayang malarapan Paruman Desa tur kaingkupin antuk krama.

(4) Wusan dados Prajuru lan Dulun Desa, sangkaning :

ha. Seda

na. Pinunas ngraga malantaran jalaran sane pastika ;

ca. Swadharmanya sampun puputing senger ;

ra. Kawusang utawi kanorayang olih krama Desa duaning iwang pamargi, manawi nilar sesana.

(5) Ngentosin, nguwasanang utawi nganorayang Prajuru lan Dulun Desa, patut kamargiang sajeroning Paruman Krama Desa , tur kaingkupin antuk Krama Desa.

Palet 3

Indik Kulkul

Pawos 15

(1) Dudonan Kulkul ring Desa Adat DADIA, luwire :

ha. Kulkul Desa ;

na. Kulkul Sekaa-Sekaa

(2) Kulkul Desa/Banjar, kamanggehang pinaka piranti utawi sarana tengeran maka wangsit, ring wewengkon wewidangan Desa/Banjar.

(3) Tetepakan suaran kulkul manut dresta, tur anggah-ungguh tetepakanipun, kaunggahang jeroning Pararem.

Pawos 16

(1) Kulkul Desa/Banjar, tan wenang ketepak yan tan sangkaning pituduh Prajuru, sajawaning tengeran kapancabhayan.

(2) Sang nepak Kulkul Desa/Banjar, tan sangkaning pituduh Prajuru, patut digelis atur supeksa maka buatan penepake; yan piwal, sang mamurug wenang katibakin denda, manut pararem.

(3) Kulkul Sekaa-Sekaa miwah kulkul pondokan-pondokan, tan kalugra nyawerin utawi matehin sukat miwah tetepakan Kulkul Desa/banjar; prade mamurug, sang mamurug taler wenang katibakin danda, manut pararem.

Palet 4
Indik Paruman
Pawos 17

(1) Dudonan Paruman ring Desa Adat DADIA, luwire :

- Ha. Paruman krama Desa, kawentenang sanistannya apisan jeroning 6 sasih utawi manut kabuatan, sane karihinin antuk tetibak arah-arah.
- na. Paruman Padgatakala, rehning wenten indik sane dahat mabuat sane pacang kabawosan, sane karihining antuk tetibak arah-arah.
- ca. Paruman Prajuru utawi Paruman Dulun Desa, kawentenang manut Kabuatan.

(2) Pamargin Paruman Krama Desa, patut nganutin dudonan :

Ha. Paruman wahu kengin kakawitin sesampune katedunin antuk pinih kedik kalih pah tiga lintang saking sang patut ngamiletin, kamanggala antuk tengeran suaran kulkul, mabusana adat Bali, tan kalugra makta gegawan sakaluwire, karihinin antuk ngarcana Bhagawan Panyarikan majalaran widhi widhana cane.

Na. Maka pangawit, kalaksanayang panyacak pangesep, karuntutin antuk nyacak dedosan, wahu kalanturang antuk parum; sesampun parumane puput, patut kacacak malih, tur sane kasep, sang ninggal paruman miwah sane nosa, wenang katibakin danda, sane ageng alitipun, kasulurang manut pararem.

Ca. Maka pamastika wahu kengin nyacak pangesep, kasulurung manut pararem.

Ra. Sajeroning paruman, tan kalugra ngwetuang wak ghora minakadi ngardi biota; sang mamurug, wenang keni pamidanda bea pacamil, sakadi dandaning anguman-uman ring paseban, sane kasulurang manut pararem.

Ka. Pamutus bebawose sane briuk sapanggul utawi ingkup, punika sane kaaptiang tur kamanggehang.

3) Prade daging parumane nenten kaingkupin, Prajuru Desa mangda ngilikang bebaos, saha pamutusnya mangda kararemin antuk Krama Desa; bilih jantos ping tiga taler nenten prasida kaingkupin, Prajuru desa dados nunas bawos ring Kerta Desa nganutin dudonan : kaingkupan paiguman Prajuru, kaingkupan paiguman Kerta Desa, pinih untat, malih katunasang pamutus sajeroning Paruman Krama Banjar.

Pawos. 18

- (1) Sajeroning Paruman Krama Desa, Bendesa Adat, Prajuru Adat, patut nyiarang pamargine ngenterang Desa, pamekas ngeninin indik :
Ha. Munjuk lungsuring gebongan pakraman saha ayah-ayahnyane, minakadi indik sulur arthabrana druwen Desa.
Na. Pangrencanan Prajuru, ngeninin utsahan Desane kapungkur.
- (2) Pamutus Paruman Krama Desa sane sinanggeh Pararem, kamanggehang maka pamitegep panglaksanaan awig-awig.

Pawos. 19

- (1) Paruman Prajuru utawi Paruman Dulun Desa, kawenangang wantah ngiricikang pangrencana marep ring utsahan desane kapungkur.
- (2) Paruman Prajuru Desa, tan kawenangang ngamedalang tetegenan ring Krama Desa, saderenge kaingkupin antuk Krama Desa.
- (3) Pamutus Paruman Prajuru utawi Dulun Desa, kengin ngwetuang pasuara manut daging pituduh sang ngawa rat, utawi ngonekang pamutus sane pecak sampun dados Pararem Krama Desa.

Palet. 5

Indik Druwen Desa

Pawos. 20

- (1) Sane kamanggehang dados druwen Desa Adat Dadia, luwire :
Ha. Kahyangan Desa, luwire :
 1. Kahyangan Tiga : Pura Desa, Pura Puseh, Pura Dalem.
 2. Kahyangan Druwen Desa sewosan ring Kahyangan Tiga, minakadi : Mrajapati, Palinggih Bale Banjar (pasar sari) Beji, Melanting lan sane seosan
Na. Setra : 0,08 Ha.
Ca. Niasa lan sesanti (keropak)
Ka. Lembaga Perkreditan Desa (LPD)
Da. Lelangwan, minakadi tetabuhan lan ilen-ilen druwen Desa, luwire :
 1. Gong
 2. Ilen-ilen wali ring pura : rejang, pendet, lsp.
 3. Lekita-lekita mabuat : pipil utawi sertifikat Awig-awig, pasuara, pararem, ekalitan Desa Adat Dadia.
 4. Palawatan Ida Bhatara marupa : pratima-pratima.

- (2) Olih-olihan Desa Adat Dadia, mawit saking :
 Ha. Paturunan saking Krama Desa.
 Na. Paica saking Guru Wisesa.
 Ca. Dana punia tiyosan sane patut
 Ra. Pah-pahan saking LPD.
- (3) Sanangken Paruman Krama Desa, Bendesa Adat patut nyiarang munjuk lungsur olih-olihan lan sapanunggalannya sane sinanggeh druwen Desa.
- (4) Olih-olihan desa lan sapanunggalannya, kanggen prabea piodalan miwah wewangunan ring pura, taler prabea tiosan marep ring kabuatan Desa Adat.
- (5) Sakaluwiring druwen Desa Adat, patut wenten lekitannya sane pastika.
- (6) Tan kalugra ngadol utawi ngesahang druwen Desa yan tan kacumponin antuk Krama Desa sami.

Palet. 6

Sukerta Pamitegep

Kaping 1

Karang, Tegal, lan Carik

Pawos. 21

- (1) Krama Desa sane ngamong karang Desa utawi karang pumahan ngrage, patut ngwatesin karangnya sowang-sowang antuk pagehan utawi turus minakadi tembok, mangda pakantenannya asri.
- (2) Wates sane mawasta gegaleng kaluan miwah gegaleng kateben mangda nganutuin dresta, tur kakaryanin olih sang negen wates inucap.
- (3) Prade karasayang pagehan utawi turus inucap nglikadin, yan pada arsa panyandinge, watese kengin ngenggen pinget utawi pracihnapal saking Agraria, sakewanten kasaksi antuk Prajuru Desa.
- (4) Prade wenten karang kabebeng, mangda kautsahayang wenten pamesuannya sane pastika.

Pawos. 22

- (1) Sinalih tunggil Krama Desa, nenten kalugra:
Ha. Ngalah-alah margi, karang desa, tegal ayahan desa, tegal utawi carik krama
lian, lan sakancan punika
Na. Ngalah-alah tegak kahyangang, setra lan sakancan tegak sane sinanggeh suci.
- (2) Prade wenten mamurug kecape ring ajeng, sang mamurug, patut ngwaliang tanah
inucap, tur sang ngalah-alah taler patut karuntutin antuk dewa danda miwah artha
danda, sane kasulurang manut pararem.

Kaping 2
P e p a y o n a n
Pawos. 23

- (1) Ngawit nandur pepayonan minakadi tanem tuwuh, patut adepa agung ngajeroang
saking wates; pepayonan minakadi tanem tuwuh sane jantos ngliwat wates, wenang
kasepatgantungin.
- (2) Pepayonan sane ngungkulin mawastu mayanin ka pisaga, sang nruwenang
pepayonan inucap patut kawara tur kairing mapiguman antuk sang rumasa
ketetehan, bilih-bilih sang nruwenang, arsa ngrebah utawi notor wit pepayonan
punika.
- (3) Pradene sampu kawara taler tan wenten usaha sang nruwenang, sang rumasa
ketetehan wenang masadok ring Prajuru Desa, tur risampune kaparitasat kandugi
wenten lelugrahan Prajuru, wahu wit pepayonane punika kengin karebah, sakewanten
panukun patih wit pepayonane punika patut katahur olih sang rumasa ketetehan
manut panglokikan sang nepasin, tur wit pepayonane sane karebah punika,
kasukserah ring sang nruwenang.
- (4) Sang patut keni pamidanda panyangaskara saha prabea manut pararem, marep ring
wewangunan sang karubuhan, luwire :
Ha. Sang nruwenang wit pepayonan sane sinanggeh mayanin, pradene pungkut tur
ngrubuhin wewangunan krama tiosan;
Na. Sang notor, monggol utawi ngrebah taru, tur ngrubuhin wewangunan krama
tiosan.
- (5) Krama Desa patut ngamanggehang kawredian tanem tuwuh sane ngawinang Desane
asri tur lestari sane kawastanin Bhuta Hita; sane mateges kalestarian lingkungan
hidup.
- (6) Sinalih tunggil krama sane pacang ngebah pepayonan minakadi tanem tuwuh sane
ngawinang desane asri tur lestari, patut masadok ring Prajuru.

Kaping 3

Wewangunan

Pawos 24

- (1) Nyabran ngwangun, sowang-sowang krama Desa patut :
Ha. Masadok ring Prajuru, pamekas marep ring wewangunan sane mapanyaitan minakadi menengin wates:
Na. Ngangge Asta Bhumi miwah gegulak asta Kosali, sanistannya manut ring patitise ka niskala.
- (2) Prade wewangunane jantos nyayubin ka pisaga, bilih-bilih temboke ring telenging wates, risampune kawara tur kairing mapiguman taler tan wenten usaha sang nruwenang, kangkat kasadokang ring Prajuru; sesampune kaparitas tur wenten lelugrahan Prajuru sang nruwenang wenang keni danda manut pararem, tur tembok inucap patut kagubar olih sang nruwenang, sanistannya mangda kakaryanang abangan.

Kaping 4

Wewalungan

Pawos. 25

- (1) Sahanan warga desa sane miara wewalungan : bawi, banteng, lsp. mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilih-bilih jantos ngranjing ngletehin kahyangan.
- (2) Prade wenten wewalungan malumbar utawi ngeleb tur ngrusak karang utawi pabianan krama sewosan, risampune kawara taler nenten wenten usaha sang nruwenang, yan wewalungan punika malih ngrusak karang utawi pabianan krama sewosan, wewalungan inucap kengin kataban, tur sang nruwenang wenang katibakin danda ngwaliang panukun wit tetandurane sane karusak, saha nahur panebas pepiaran tetabanan, manut panglokikan Prajuru Desa.
- (3) Prade wenten wewalungan ngranjing jantos ngletehin genah suci, minakadi kahyangan, pamrajan lan sakancan punika, risampune kaparitas antuk prajuru, sang nruwenang wewalungan punika inucap wenang keni danda, minakadi dewa danda lan artha danda, agung alitipun manut kecap sastra agama, sane kapikukuh antuk Krama Desa.
- (4) Krama Desane patut nyerayanin wewalungan miwah sarwa prani, tan kapatut mademang paksi, nuba ulam lan sakancannya, pinaka sinalih tunggil usaha Krama Desa ngardi Bhuta Hita.
- (5) Sang mamurug kecape ring ajeng, wenang keni danda manut pararem.

Kaping 5
Indik Bhaya
Pawos. 26

- (1) Bacakan bhaya, luwire : jiwabhaya, arthabhaya, agnibhaya, toyabhaya, lindubhaya, lsp sane ketahipun kawastanin Pancabhaya.
- (2) Sinalih tunggil krama sane manggihin prachina pastika wentene sahanan pancabhaya, patut digelis nepak kulkul tengeran kepancabhayan, tur digelis masadok ring Prajuru.
- (3) Prade desane kahanan jiwabhaya, krama desane patut ngaturang upacara pamahayun desa manut kecap sastra agama sane kapikukuh antuk krama, tur sang ngwetuang jiwabhaya, katur ring sang ngawawenang.

Pawos. 27

- (1) Sinalih tunggil krama sane manggihin prachina pastika wentene arthabhaya utawi kamalingan, patut digelis nepak kulkul tengeran pamitulung manut pawos 15 (4) utawi Pawos 16 (1); sang kamalingan patut atur supeksa ring Prajuru; sang kacihnan ngamaling, katur ring sang ngawawenang, maweweh malih patut keni dewa danda lan artha danda manut pararem, yan ipun ngamaling barang druwen desa sane sinanggeh suci
- (2) Sowang-sowang krama desa tan kapatut mapailonan ring dusta, sang kacihnan mapailonan ring dusta patut katibakin danda kadi danda ning maling, sane kasulurang manut pararem.
- (3) Indik ngerereh reramon minakadi daun kelapa, ron, miwah sane sewosan ring pabianan krama tiosan rikenjekan suwung, kasulurang manut pararem.
- (4) Indik ngranjingin pakubon utawi pakarangan krama sewosan rikala suwung, mawastu raris sang maderbe pakubon utawi pakarangan kaicalan, kasulurang manut pararem.
- (5) Indik Ngranjingin pakubon utawi pakarangan krama sewosan rikala suwung riantukan wenten pisarat sane mabuat, minakadi mapangarah miwah kabuatan sane lianan, kasulurang manut pararem.

Kaping 6
Panyanggran Banjar
Pawos 28

- (1) Krama desa ring sawewengkon Desa Adat Dadia patut sareng nyanggra karya pasuka-dukan sowang-sowang krama Desa.
- (2) Tetibak panyanggrane inucap ring ajeng, kasulurang manut pararem.
- (3) Sowang-sowang Krama Desa sane pacang nangun karya suka-duka sane mabuat, mangda masadok ring prajuru.

CATUR THAS SARGAH
SUKERTAN TATA AGAMA

Palet I

Indik Dewa Yajnya

Pawos. 29

- (1) Kahyangan-kahyangan panyiwian Krama Desa Adat Dadia luwire :
Ha. Kahyangan Tiga : Pura Desa / Baleagung, Pura Puseh, Pura Dalem.
Na. Kahyangan-kahyangan panyiwian Krama Desa tiosan ring Kahyangan Tiga :
Palinggih Bale Banjar utawi Pura Pangayatan, miwah Mrajapati utawi
Prajapati, Beji, Melanting.
- (2) Tegak piodalan ring sowang-sowang kahyangan inucap ring ajeng, kamanggehang
sakadi ring sor punika :
Ha. Pura Desa/Baleagung ring rahina anggara kasih tambir.
Na. Pura Puseh ring rahina anggara kasih tambir.
Ca. Pura Dalem ring rahina purnamaning sasih kapat.
Ra. Mrajapati ring rahina purnamaning sasih kapat.
Ka. Pura Pasar sari ring rahina purnamaning sasih kedasa.
- (3) Pamargin pangacine ring sowang-sowang kahyangan inucap ring ajeng, manut kecap
sastra agama, saha kalaksanayang kanista, madyama, utama, manut kewentenan krama
sane kaingkupin jeroning pararem.

- Ring sowang-sowang pura inucap ring ajeng, patut kaadegang Pamangku
- (1) pidabdabe ngadegang Pamangku, nganutin dudonan : -
- (2) Ha. Ngwilang saking turunan utawi ngwaris;
Na. Malantaran nyanjan utawi nuhur ring pura sane karerehang Pamangku.
Ca. Malantaran kapilih antuk Krama Desa.
Sang tan wenang kaadegang dados Pamangku, luwire :
- (3) Ha. Cedangga, luwire : peceng, perot, cungh lan sapanunggilannya;
Na. Sapasira ugi sane nenten kepatutan manut pararem.
Ca. Nandang sakit ila, ayan, buduh, miwah pinungkan sane tan keneng tinambanan;
Ra. Sang maderbe parilaksana nenten becik.
Prabea Kapamangkuan :
- (4) Ha. Prabean upakara-upakara adiksa widhi utawi ngwintenang
Pamangku, kamedalin miwah kalaksanayang antuk Krama Desa;
Na. Marep ring prabean pitra yajnya ring Pamangku, Panyade, Serati, Sutri, yan seda ri
wakas Krama Desane patut maweh dana punia atiwa-tiwa, manut pararem.
- (5) Pamangku, patut ngamanggehang sesana miwah agem-ageman Pamangku.

- Swadharmaning Pamangku, luwire :
- Ha. Ngenterang upacara piodalan ring kahyangan sane kaempon utawi ring pakubon
sowang-sowang krama.
- Na. Prade sinalih tunggil Pamangku Kahyangan Desa kapialang utawi cuntaka, kengin
nyelang Pamangku Kahyangan Desa tiosan, utawi nuhur sang sulinggih, katitenin antuk
Prajuru;
- Ca. Yan Pamangku kalayusekaran, wenang anglepas swadharma, kasulurang manut pararem.
- Ra. Yan Pamangku sampun tigang rahina ngayah ring pura sane kaempon, kancit wenten
kulawargannya kalyusekaran, Pamangku inucap tan keneng cuntaka, sakewanten nenten
kengin budal salami piodalan, lan ngewangun pura.
- Ka. Mungghah tedun ring palinggih-palinggih Kahyangan Desa miwah ngiyasin pralingga-
pralingga, manut pamastika prajuru;
- Da. Ngrajengang sesanan Pamangku.

Pawos. 32

Patias utawi olih-olih Pangku,luwire :

Ha. Panyelasan miwah sarin canang rikala muput yajnya ring sowang-sowang pakubon krama:

Na. Luput pakaryan miwah reramon.

Ca. Polih apahtigan sarin canang rikala wenten aci ring kahyangan sane kaemponin;

Ra. Luput saking saluwiring prabean wewangunan ring kahyangan sane kaemponin;

Pawos. 33

(1) Pamangku Kagentosin,riantukan :

Ha. Seda;

Na. Pinunas ngraga,minawi kageringan lan sapanunggilannya;

Ca. Kawusanang antuk Krama, riantukan nilar sesanan Pamangku.

(2) Tata carane ngadegang miwah ngentosin Pamangku,kasulurang manut pararem.

Pawos. 34

Indik kasukertan kahyangan,kadudonang sakadi ring sor puniki :

(1) Sane nenten kalugra ngranjing ka pura luwire :

Ha. Sang katiban cuntaka,minakadi sebel ngraga :

1. Sebel kandel ngrajaswala,salami dereng mabresih

2. Sebel antuk ngembasang putra, salami 42 rahina,pateh ring sang karuron yening pet wenten krama desa sane nunggal dikedadosan ring tigang sasih

3. Sebel pangantenan,sedereng mabiakala utawi makala-kalan,

4. Sebel riantukan kalayusekaran,jantos puputing sengker kacuntakan,mekadi sebel krama tigang ranina ngawit saking mependem/pelebon.

- Na. Makta sahananing bebaktan sane sinangeh ngletehin,manut kecap sastra agama
- Ca. Sato agung minakadi wewalungan suku pat, sajawaning rikala mapepada.
- Ra. Anak alit sedereng mayusa tigang sasih.
- Ka. Mabusana sane tan manut kadi tatacaraning ngrajing ka pura.
- Da. Sadereng polih wak-wakan utawi pituduh saking Prajuru Desa.
- (2) Tata busanane ngrajing ka pura,kasulurang manut pararem
- (3) Pratingkahe tan wenang ring pura luwire :
- Ha. Masumpah utawi macoran,sajawaning pituduh Prajuru Desa
- Na. Ngamedalang wak parusya utawi wak capala
- Ca. Mabanyu,makoratan,masesenengan,malokem dados asiki lanang wadon,nyangsang busana
- Ra. Ngias raga minakadi menahang wastra,menahang pusungan lan sakancan punika,sajawaning sang sulinggih miwah pinandita.
- (4) Sewosan ring Pamangku, tan kalugramungguh tedun ring palinggih-palinggih,sajawaning wit saking pituduh Prajuru Desa Adat.
- (5) Sang mamurung kecape ring ajeng,wenang keni dewa danda,manut pamutus pararem.

Pawos. 35

- (1) Yan wenten jadm karawuhan ring pura boya saking nyanjan tur ngawinang krame biapara,wenang keni dewa danda lan artha danda,sane kasulurang manut pararem.
- (2) Prade Kahyangan Desane kahanan durmanggala minakadi kapancabhayan,pamangku patut digelis masadok ring Prajuru Desa Adat.
- (3) Indik upakara-upacara pamahayun kadurmanggalan Kahyangan Desa mapagamel kecap sastra agama,sane kasungkemin olih Krama Desa

Palet 2

Indik Resi Yajnya

Pawos. 36

- (1) Sang pacang madeg sulinggih utawi madwijati patut masadok ring Prajuru Desa Adat miwah Parisada Hindu Dharma Indonesia.
- (2) Prajuru Desa Adat patut ngawas lan nitenin tur wenang mialangin,prade kacihnan wenten indik sane tan manut kecap sarta agama,tur sareng nyaksi upakara-upacara padwijatiannya.saha nglantur nyiarang jeroning Paruman Krama Desa tegep rawuhing wates kawenangannya muput yajnya.
- (3) Krama Desa patut madana punia sapamadeg miwah ring panglepas sang sulinggih ri wekas. katuntun antuk Prajuru Desa.
- (4) Sang sulinggih wenang polih leluputan ayahan miwah peson-peson.

Pawos. 37

- (1) Sajeroning muput yajnya. sang sulinggih patut ngutamayang muput yajnya ring wewwngkon Desa Adat Dadia.sesampunnya puput.wahu muput yajnya ring wewengkon desa tiosan utawi ka dura desa.
- (2) Krama Desane sami,patut sareng ngawas lan nitenin katuntun antuk Prajuru.mangda sahanan yajnya sane kalaksanayang olih sowang-sowang Krama Desa. kapuput olih sulinggih utawi pinandita.manut kawenangannya sowang-sowang.

Palet 3

Indik Pitra Yajnya

Pawos. 38

- (1) Desa Adat Dadia patut sareng nyanggra yan wenten sinalih tunggil krama sane nglaksanayang Pitra Yadnya.
- (2) Tatacara panyanggrane inucap ring ajeng kasulurang manut pararem.
- (3) Dudonan pamargin Pitra Yajnya :

Ha. Majalaran mendem utawi ngeseng, maka cihna makingsan ring Prethiwi utawi makingsan ring geni, pinaka dharana antos nuptupang prabea:

Na. Majalaran upacara pangabenan utawi palebon.

Ca. Riwusan ngaben, patut kalanturang malih antuk upacara mamukur tur karuntutin malih antuk nglinggihang dewa pitara.

Pawos. 39

(1) Sinalih tunggil krama sane kalayusekaran atiwa-tiwa, mangda masadok ring Prajuru Adat / Bendesa Adat Dadia

Ra. Prade makingsan ring geni, panyanggran Krama Desa, Krama Tempekan selanturnya, manut kadi daging pararem, jantos pamargin upacarane puput.

Ka. Prade kaabenang, panyanggran krama desa adat dadia selanturnya, manut kadi daging pareram, jantos pamargin upacarane puput.

(2) Tan kalugra nginepang bangbang.

(3) Desane maweh galah ring sang kalayusekaran sajeroning pitung rahina kengin atiwa-atiwa, sejawaning wenten kabuatan tios saking sang yajamana.

(4) Larangan pependeman miwah pelebon ring wewengkon Desa Adat Dadia, kaunggahang jeroning pararem.

(5) Prade wenten kalayusekaran rikala piodalan ring kahyangan Desa, kengin mendem tan pasadok, tur patut ngerereh galah mamargi rikala wengi, tur tan kalugra nepak kulkul tengeran kalayusekaran.

Pawos. 40

(1) Desa Adat Dadia, ngamanggehang indik cuntaka, mapagamel ring Pamutus Mahasabha Hindu Dharma Indonesia.

(2) Tatacarane nyulurang kacuntakan, mapagamel ring kecap sastra agama, kaanutang ring dresta desa, sane kaingkupin jeroning pararem.

(3) Sinalih tunggil krama sane kahanan cuntaka, yan durung utas, tan kalugra nyarubin genah suci druwen desa miwah druwen sowang-sowang krama.

(4) Sang mamurug, patut keni dewa danda, manut pararem.

(5) Sengker utas cuntaka manut kewentenannya, kasulurang sakadi ring sor puniki :

Ha. Kalayusekaran, cuntakannya kaanutang ting dresta desa miwah sastra dresta (cuntaka krama desa tigang rahina)

- Na. Ngrajaswala, cuntakannya tigang rahina ngawit saking ngrajaswala, utawi salamin ngrajaswala.
- Ca. Ngembasang putra, abulan pitung rahina ngawit saking putrane embas, ngantos katiwakin upakara-upakara tutug kambuhan.
- Ra. Karuron, cuntakannya abulaan pitung rahina ngawit saking karuron, ngantos katiwakin tirtha pamrayascitta.
- Ka. Pawiwahan, cuntakannya ngantos sampun makala-kalan.
- Da. Gamia gamana, cuntakannya ngantos sampun kapalasang, karuntutin antuk mrayascitta sikian, desa adat lan kahyangan desa.
- Ta. Salah timpal, cuntakannya kapuputang manut kecap sastra agama miwah drestaan desa.
- Sa. Anak istri mobit malantaran lokika sanggraha kandungi nenten katiwakin upakara-upakara pabiakawonan, cuntakannya ngantos katiwakin upakara-upakara pabiakawonan.
- Wa. Anak istri ngembasang putra malantaran lokika sanggraha kadungi pecak nenten katiwakin upakara-upakara pabiakawonan miwah widhi widhana, cuntakannya ngantos wenten meras anake alit, karuntutin antuk upakara-upakara manut kecap sastra agama.
- La. Sad atatayi, cuntakannya ngantos sampun mrayascitta sikian miwah ngesihin prawretti.
- Ma. Mamitra ngalang, cuntakannya ngantos katiwakin upakara-upakara pabiakawonan. (yening anak kari anom)

(6). Cuntaka kalayusekaran/kapademan :

Ha. Kapendem cuntakannya :

1. Cuntaka ka Banjar, laminipun tigang rahina ngawit saking wusan mendem, ngantos sampun maprayascitta.
2. Kulawargannya sajeroning pakarangan manut drsta.

Na. Kaabenang Cuntakannya.

1. Cuntaka ka Banjar, manut dresta sane kapikukuh antuk pararem tigang rahina.
2. Cuntaka sang nyambut karya pitra yajnya, manut dresta sane kapikukuh antuk pararem tigang rahina.

(7). Sang katibencuntaka,luwire :

Ha. Kalayusekaran,sane cuntaka :

1. Sang kalayusekaran
2. Kulawargannya
3. Bebanjarannya.

Na. Ngajaswala,sane cuntaka : sang ngrajaswala.

Ca. Ngembasang putra,sane cuntaka : sang madebe putra,lanang wiadin istri,utawi yayah renan sang wahu embas.

Ra. Pawiwahan,sane cuntaka : sang mawiwaha lanang istri.

Ka. Karuron,sane cuntaka : sang karuron rawuhing lanangnyane.

Da. Gamia gamana,sane cuntaka :

1. Sang ngalaksanayang gamia gamana
2. Desa adatnyane

Ta. Salah timpal,sane cuntaka :

1. Sang nglaksanayang salah timpal.
2. Desa adatnyane.

Sa. Anak istri mobot malantaran lokika sanggraha kandugi nenten katiwakin upakara-upakara pabiakawonan,sane cuntaka : anake istri sane mobot punika.

Wa. Anak istri ngembasang putra malantaran lokika sanggraha kandugi pecak nenten katiwakin upakara-upakara pabiakawonan miwah widhi widhana,sane cuntaka :

1. Sang ngembasang putra;
2. Putrane sane kaembasang.

La. Mamitra ngalang,sane cuntaka : sang nglaksanayang mamitra ngalang punika.

Ma. Sad atatayi,sane cuntaka : sang nglaksanayang sad atatayi

(8). Sang tan keneng cuntaka,luwire :

Ha. Sang sulinggih.

Na. Pamangku Kahyangan Tiga rikala piodalan ring pura,risampune ngalang sasih utawi ngalang tengah,kacirenin antuk atur piuning utawi sampun nanceb sesalon.

Pawos. 41.

- (1) Pamargin atiwa-tiwa utawi pangabenan kalaksanayang mapagamel kecap sastra agama miwah dresta.

Palet 4

Indik Manusa Yajnya

Pawos. 42

- (1) Krama Desa Adat Dadia, patut sareng nyanggra miwah nitein yan wenten sinalih tunggil krama nglaksanayang Manusa Yajnya sane mabuat.
- (2) Tatacara panyanggrane inucap ring ajeng kasulurang manut pararem.
- (3) Sang pacang nglaksanayang Manusa Yadnya sane mabuat, mangda masadok ring Prajuru.
- (4) Manusa Yajnya inggih punika, upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, ngantos kalayusekaran ri wekas.
- (5) Upacara-upacara inucap ring ajeng kamargiang kanista, madhayama, utama, manut kecap sastra agama miwah dresta.

Palet 5

Indik Butha Yajnya

Pawos. 43

- (1) Desa Adat Dadia, patut nyanggra pamargin Butha Yajnya marep ring kabuatan Desa Adat Dadia.
- (2) Pidabdab pamargin Butha Yajnya inucap ring ajeng, mapagamel ring kecap sastra agama, kaanutang ring drestan desa, pararem.
- (3) Krama desa Adat dadia patut sareng nyanggra sinalih tunggil krama sane nglaksanayang Butha Yajnya sane mabuat.
- (4) Sang pacang nglaksanayang Butha Yajnya sane mabuat, mangda masadok ring Prajuru.

Pawos. 44

- (1) Butha Yajnya marep ring kabupaten Desa Adat minakadi carun sasih miwah sane lianan, kasulurang manut pararem.
- (2) Indik pamargin palelastian utawi makiyis, kasulurang manut pararem
- (3) Nangken warsa, rikalaning Tilem Sasih Kasanga, patut kalaksanayang Tawur Kasanga, kalanturang antuk Pangrupukan, pinaka china nyanggra pangrawuh Saka Warsa (Tahun Baru Saka) ring pananggal apisan sasih Kadasa, sane kawastanin Nyepi.
- (4) Rikalaning Nyepi, sowang-sowang Krama Desa patut ngamargiang Catur Brata Panyepian, inggih punika :
 - Ha. Amati geni : Tan kengin maapi-api
 - Na. Amati karya : Tan kengin nyambut karya
 - Ca. Amati lelangwan : Tan kengin maoneng-onengan, ngwijilang suara ghora, nabuh gegambelan, lan sakancannya
 - Ra. Amati lelungan : Tan kengin malelungayan mrika-mriki.
- (5) Catur Brata Panyepian punika kamargiang saking semeng jantos benjangne ngedas rahina.
- (6) Mangda pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidanda, sane kasulurang manut pararem.
- (7) Benjangne ring panggah ping kalih Sasih Kadasa, kawastanin ngembak geni, sowang-sowang krama patut saling ngaksamayang sane kawastanin Dharma Santi.

PANCAMAS SARGAH
SUKERTAN TATA PAWONGAN

Palet I

Indik Pawiwahan

Pawos. 45

- (1) Krama Desa Adat Dadia, patut sareng nyanggra miwah nitenin sinalih tunggil krama sane nglaksanayang pawiwahan.

- (2) Pamargin Pawiwahan, luwire :
 - Ha. Malantaran pepadikan :
 - Na. Malantaran ngorod utawi marangkat utawi ngrangkat.
 - Ca. Malantaran nyentana utawi marangkat nyentana nyeburin.
- (3) Indik Pawiwahan, Desa adat Dadia, ngamanggehang Undang-undang Nomor 1 tahun 1974, miwah Peraturan Pemerintah Nomor 9 tahun 1975, indik Pawiwahan.
- (4) Tatacara panglaksanannya, mapangamel ring kecap sastra agama, kaanutang ring dretan desa, sane kapikukuh jeroning pararem.
- (5) Sinalih tunggil krama sane pacang nglaksanayang pawiwahan, mangda masadok ring Prajuru.

Palet 2.

Indik Nyapihan

Pawos. 46

- (1) Prajuru Desa Adat Dadia, wenang sareng mawosin miwah nitenin yan wenten sinalih tunggil krama sane mapikarsa pacang palas marabi, gumanti nenten kadurusan dados nyapihan.
- (2) Yan krama inucap kukuh ring pikarsannya, desa Adat minakadi Bendesa Adat, nenten sumakuta ring pamarginnya.
- (3) Saderenge pastika polih pamutus saking sang ngawawenang minakadi sang Rumawos (Pengadilan Negeri), krama inucap manggeh keni tetegenan krama, sakadi nguni.

Palet 3

Indik Sentana

Pawos. 47

- (1) Prajuru Desa Adat Dadia, wenten sareng mawosin miwah nitenin yan wenten sinalih tunggil krama sane ngindikang sentana.
- (2) Indik sentana, Desa Adat Dadia, ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan desa, sane kapikukuh antuk pararem.
- (3) Sang pacang ngrajegang sentana, manga masadok ring Prajuru.

Palet 4
Indik Warisan
Pawos. 48

- (1) Prajuru Desa Adat Dadia,wenang sareng mawosin miwah nitenin yan wenten sinalih tunggil krama sane ngindikang warisan.
- (2) Indik warisan,Desa Adat Dadia,ngamanggehang uger-uger jagat minakadi kawicaksanan sang maraga Guru Wisesa,kaanutang ring drestan desa, sane kapikukuh antuk pararem.
- (3) Sang pacang ngrajegang sentana,manga masadok ring Prajuru.

SAT SARGAH

WICARA LAN PAMIDANDA

Palet. 1

Indik Wicara

Pawos. 49

- (1) Sane wenang mawosin wicara ring wewengkon desa Adat Dadia inggih punika Prajuru Desa maka miwah Dulun Desa sane kawastanin Kerta Desa.
- (2) Prade sang mawicara tan cumpu ring Pamutus Kerta Desa,kengin nunasang ring Sang Rumawos.
- (3) Sahanan wicara sane mawit saking kacorahan sakaluwire sane kasinanggeh nungkasih daging awig-awig,pasuara miwah pararem,patut digelis kabawosin olih Prajuru,nenten nyantosin pasadok malih.
- (4) Sajaba wicara sakadi ring ajeng,patut nyantosin pasadok nunas bawos.
- (5) Panepase mangda pastika nyantenang iwang patut malarapan Tripramana,inggih punika : Saksi,likita,bukti,tur panepase tan maren nepek ring Catur Dresta.

Palet. 2

Indik Pamidanda

Pawos. 50

- (1) Desane, wenag nibakang pamidanda ring warga Desa sane sisip.
- (2) Tetikbak pamidanda inucap ring ajeng, kalaksanayang olih Prajuru.
- (3) Bacakan pamidanda, luwire :
 - Ha. Ayahane panukun kasisipan;
 - Na. Artha danda saha panikelnya miwah panikel paturunan;
 - Ca. Rerampangan;
 - Ra. Kanorayang;
 - Ka. Kawusanang makrama tur pipil karang ayahannya kawaliang;
 - Da. Panyangaskara.
- (4) Pamidanda sane katiwakang, patut masor singgih, manut kasisipan
- (5) Jinah utawi arthabrana pamidanda, ngaranjing dados druwen Desa.

Pawos. 51

- (1) Krama sane langkungan ring tigang paruman nglantur nenten nahur paturunan miwah dedandan, wenang karampag.
- (2) Tetibak rerampang, nganutin tatacara sakadi ring sor puniki :
 - Ha. Kalaksanayang olih Prajuru, kasarengin antuk krama pinih akeh tigang diri, maka saksi.
 - Na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangarangannya manut ring utang sang karampag
 - Ca. Prajuru patut miteketang mangda barang-barang sane karampag punika, digelis katebus masengker awuku, tur ring kutus rahinane pacang kalelang utawi kaadol.
 - Ra. Tan kengin ngrampang saluwiring barang sane patut inggilang manut kecap sastra agama, miwah mademang pangupajiwan sang karampag.

Pawos. 52

- (1) Prade sang pacang karampag mialangin pamargin terampagan inucap,mawastu sampun tan nganutin linging awig-awig,krama inucap wenang kanorayang.
- (2) Yan krama inucap manggeh piwal yadiyastun sajeroning makudang-kudang paruman sampun kawehin patinget sakewanten manggeh piwal,tan wenten pamargin sewos,sajawaning krama inucap kawusanang makrama Desa Adat Dadia.
- (3) Rerampagan inucap ring ajeng kabawos buntas,risampun sang kené rerampagan punika:
Ha. Nunas geng rena sainampura ring ajeng Krama Desa,riantukan polih piwal pasubaya sane pecak sampun kararemi.
Na. Nahur pangargan panguwak pasubaya sadaweg pacang karampag,kadulurin antuk prayascitta.

SAPTAMAS SARGAH
NGUWAH-UWUHIN AWIG-AWIG

Pawos. 53

- (1) Nguwah-uwuhin Awig-awig Desa Adat puniki,wantah kengin kalaksanayang antuk Paruman Krama desa.
- (2) Pararsane nguwah-uwuhin punika, mangda mawit saking pakarsa Krama desa, yadiyastun kamedalang antuk sinalih tunggil Prajuru, utawi sinarengan.

Pawos. 54

- (1) Sakaluwiring indik sane sampun kamagiang sadereng awig-awig puniki kasurat,mangda kaanutang ring sadaging awig-awig puniki.
- (2) Sakaluwir sane durung kasurat sajeroning awig-awig puniki,menawi kangkat kanggen mitegepin awig-awig puniki,pacang kasurat jeroning Pararem.

ASTAMAS SARGAH

S A M A P T A

Pawos. 55

- (1) Awig-awig puniki kawastanin Awig-awig Desa Adat Dadia
- (2) Awig-awig puniki kamargiang ngawit saking kaingkupi utawi kararemin.

Pawos. 56.

- (1) Awig-awig puniki kararemin duk rahina Budha Keliwon dungguan pangelong ping 6 sasih Jyestha, Isaka Warsa 1921, tanggal 7 Mei 1999, magenah ring Bale Banjar Dadia.
- (2) Awig-awig puniki kalinggatanganin antuk Bendesa Adat Dadia miwah olih sang ngawawenang manut kawenangannya sowang-sowang, tur kapikukuh antuk Murdhaning Pamikukuh : Bupati Tabanan


- (3) Register Nomor : 189/09/HK
Tanggal : 17 Juni 2002



wir sang nglinggatanin.

Benteng Adat Dadia

(Gusti Putu Mayun)




1. Kepala Dusun Dadia

(Wayan Dadiana)

Saksi - Saksi

2. Kelian Adat Banjar Dadia

(I Nyoman Suadnyana)



3. Kepala Desa Babahan

(I Nyoman Satiayasa)

5. Camat Penebel

(I Nyoman Gede Gunawan S Sos)
NIP. 010226408



4. Kecamatan Penebel


(Wayan S Ag)

Kawikanin Olih:



1. Ketua BPPK Kabupaten Tabanan

(I Wayan Samba)



2. Ketua PHDI Kab Tabanan

(Made Samba)

Kepala Kantor Departemen Agama
Kabupaten Tabanan

(Drs) Wayan Senatra

MURDHANING PAMIKUKUH
BUPATI TABANAN

(N Adi Wiyatama S Sos)

NAMA – NAMA PENYUSUN AWIG – AWIG

1. I WAYAN SANTERE
2. NYOMAN SUADNYANA
3. KETUT ASTAWA
4. WAYAN PURNIYANTA
5. WAYAN NEDRA
6. WAYAN BUDIANA
7. I GEDE DADHI S
8. MADE SUASTIKA
9. I GST. PUTU MAYUN
10. MADE MUSTIKA
11. I GST. NYOMAN DENDHI
12. WAYAN PUTRA
13. MADE ARNAWA
14. NYOMAN SUYENDRA
15. NYOMAN RAI PUTERA
16. I GST. PUTU MANUABA
17. KETUT SUTAMA
18. MANGKU PUSEH (I KETUT SUDIRA)
19. MANGKU BALE AGUNG (I WAYAN JIGER)
20. MANGKU DALEM (I KETUT PUJA)
21. PAN SUWIRYA (I NY. MIRIB)
22. PAN NUDRI (I NY. MANDI)
23. PAN SUWIDI (I NY. MADIA)
24. PAN DEGER (I WY. GARI)
25. KETUT KUTA
26. WAYAN SUTITA
27. WAYAN SUDIANA
28. WAYAN SUMATRA
29. KETUT SUJI ASTAWA
30. NENGAH NUJANA WIRTANA
31. I GST. KETUT SURATA
32. I GST. MADE SUARYA
33. I GD. NYOMAN SUKADI
34. WAYAN SULANDRA
35. NYOMAN SUARTA
36. WAYAN SUPENG
37. NYOMAN WEDRA
38. I NYOMAN SUBADRA